

E mords Idee

Wie merr uns omm letzde Sunndaach omm Stommdisch getroffe hawwe, isch unn moi Kummbeern Schorsch unn Karl, unn noochdem jeder enn Äbbelwoi bestellt hadd seet de Karl: No Schorsch, was gibt's Neies? Hosde derr widder ebbes ausgedenkt?

Isch denk merr allsfort ebbes aus, gibt de Schorsch ze Antwort.

Ei was donn?, habb isch gefroochd.

De Schorsch hott sich umgeguggd, ob emm aach kooner zuheern dut unn hott gepischberd: Iwwer die Roboter.

Wie, iwwer die Roboter?, frächt de Karl.

De Schorsch hott weider gepischberd: Ja, iwwer die Roboter. Mett dene habb isch merr was ausgedenkt.

No ja, moont de Karl, doodriwwer mache sich vill Gedonke: De Äbbel, de Guugel, de Daimler, de Kuka und enn Haufe Japaner, was willsden du dir noch ausdenke.

Ja, pischberd de Schorsch, merr sieht joo immer mieh vunn dene, weil die solle joo aach im Haushalt unn im Kronkehaus helfe, unn die sinn all nitt rischdisch gebaut.

Aha, saach isch, unn du, Schorsch, waaßt, wie die rischdisch gebaut werrn.

De Schorsch hott genickt. Nodierlich waaß isch dess. Isch habb aach schunn dehoom e Modell gebaut unn jetz such isch mir nor noch e Firma, die su en Roboter ferr Haushalt unn Kronkehaus baue dut.

Hosde mol e Bild vunn doim Roboter? hott de Karl gefroochd, den deede merr gern emol seh.

De Schorsch hott de Kobb geschitteld. Vunn dem Modell habb isch nor e Zeichnung, awwer isch habb aach Fotos. Guggt emol doo. Donn hodder in soi Jackedasch gegriffe unn hott zwaa Fotos unn e Stick Babier erausgehollt.

De Karl guggt uffs erste Foto druff unn rief: Was sollen dess? Dess iss joo enn Rab.

Hier iss noch e Bild, seet de Schorsch

Ei dess iss joo enn Rawemensch vumm Tommi Reinelt, habb isch gerufe.

Jetz hott de Schorsch gegrinst. Unn der hott mich uff die Idee mett moim Roboter gebrochd. Hier guggt emol uff dess Babier. Was sehder doo?

De Karl seet: Sozesaache enn Roboter meddem runde dicke Kobb, mett zwaa Händ, mett Rädder unn aach mett Fieß zum Treppenuff gieh unn mett emm mords Schnawwel.

De Schorsch war gons uffgereeschd. Ja! Unn der iss auswechselbar unn je noochdem was ze mache iss, kann dess enn Raweschnawwel soi. In dem werrn Sensorn oigebaud zum Fiewer- odder zum Blutdruck messe odder ferrs Steche ferr Zuckerkronke. Odder in de Kisch zum Quetsche auskerne, su ebbes halt. Unn ferrs Fiddern vunn Kronke werrd donn enn Endeschnawwel montiert. Unn dess Dollsde iss, die Schnäwwel kenne aach flerschmerisch babbele, je noochdem, was ferrn Code ...

Was?, habb isch gerufe, Dreck mächt der aach?

De Schorsch hott mich bies oogeguggd. Schleeschdschwätzer. Isch moon, was ferrn Sprachcode der oigewwe kriecht hott. No, was duderrn vunn moine Idee halle?

De Karl unn isch hawwe uns oogeguggd, bis isch gesaad habb: Schorsch, e mords Idee. Doodeferr werrsd bestimmt enn Preis krieg.

Moonsde?, frächt de Schorsch.

Ja, saach isch, de Preis ferr de greeßde Bleedsinn aller Zeide.

Eiern Honnes